

LESEGNER avec bann ki dekouraze

Dan
to sagrin,
rod
Konsolasion
ek
Lesperans
dan Laparol Bondie.

Twa ki pe viv enn gran soufrans, to pou trouv Konsolasion ek Lesperans
dan Laparol Bondie.

Version orizinal: AS

Tradiksjon Kreol Morisien: Sosiete Biblik Moris

©Text:

Konteni

Introdiksion	4
Enn mesaz spesial pou twa ki andey	6
Mo dan sok e mo pa oule krwar “Mo pa krwar ki sa finn arive.”	8
Koler ek Resantiman “Kifer mwa?”	14
Kilpabilite ek Douler “Mo ti bizin finn fer plis!”	24
Solitud ek Laper “Ki mo pou fer aster-la?”	35
Gerizon ek Nouvo Lavi “Mo pou ranpli ar Lesperans!”	44
Aksepte seki finn arive e Gagn Lape “Mo pou loue mo Bondie”	57

Bondie pros avek bann dimounn ki dan tristes

Enn dimounn ki to kontan finn kit sa lemond-la. To ena enn gran sagrin e tout sort kalite lemosion ranpli to leker: dout, koler, laper, kilpabilite ek enn gran langwas. Kapav sa bann santiman-la pa pou vinn enn apre lot. Tou ansam form parti to sagrin. ***Lasagrin***, li enn lexperyans imin, enn reaksion natirel ki nou resanti kan nou perdi enn pros ki nou kontan.

Sa pou ed twa boukou si to kapav rekonet sa bann santiman-la e les to bann lemosion sorti. Kan to santi enn gran lapert, trouv enn fason pou exprim to sagrin. Sa li pou enn bon latitid. Plas to lesperans ek to konfians dan Bondie. Li pou donn twa lafors pou kontinie ek pou fer fas sak nouvo zour.

“LESEGNER touletan pre ar seki pe perdi kouraz;
li replant lespwar kot lespwar finn mor.
Dimounn ki obeir Bondie fer fas boukou traka,
Me LESEGNER delivre li dan tousala.”

Psom 34: 18 – 19

Dan bann paz ki pou swiv, to pou zwenn bann konpagnon kouma Zezi, Pol, Lerwa David, Noemi, Zob, bann profet ek bann dimounn ki finn ekrir bann Psom. Zot osi zot finn konn lasagrin parey kouma twa. Zot lexperyans pou ed twa pandan ki to “travers vale bien som.”

Kan lamor pran kikenn ki to kontan, Bondie ki finn vinn lor sa later-la atraver Zezi-Kris, konn bien ki douler to pe resanti. Zezi pe asir twa ki sa separasion-la li pa eternal. Ala seki li dir bann ki plas zot konfians dan li: “Zame mo pa pou kit twa, ni abandonn twa.” (Ebre 13: 5b) Zezi pe ofer twa so lebra pou ser twa avek Lamour, pou konsol twa e pou apez to douler.

Enn mesaz spesial pou twa ki dan tristes

Kamarad bieneme,

To pe travers dan enn moman tristes. Nou anv sinserman ki bann text Lekritir ki ena dan sa liv-la amenn konsolasion dan to leker. Ala de-trwa sizesion ki pou ed twa ek gid twa dan to lektir:

- **Koumans** par lapriyer. Demann Lespri Sin Bondie rekonfort twa ek fortifie twa par sa bann Parol Lekritir la.
- **Konsilte** konteni sa liv-la. Trouv bann seksion ki tous to leker e lir bann pasaz ki koz avek twa dan sa moman-la.
- **Reflesi** lor bann kestion ki ena dan sa seksion ki to finn swazir la.
- **Les** to lemosion sorti – lakoler, fristrasion, dezespwar, laper, solitud, soulazman, pitie pou tomem, ouswa ninport ki lezot lemosion. Fode to rekonet to bann santiman pou ki to kapav sirmont zot.
- **Ekrir** to bann panse ek to bann santiman dan enn karne.

- **Terminn** sa moman refleksion la par lapriyer. Demann Bondie beni seki to finn lir. Apre, lir enn parmi bann lapriyer benediksjon ki trouv dan paz 64.
- Si posib, **kopie** lor enn ti-karton, bann verse ouswa bann pasaz ki konsern twa direktman. Gard zot avek twa e pran letan lir zot.
- **Rikord** lor to portab ouswa lor enn lot laparey tou bann pasaz ki to pli kontan dan sa liv-la. Lerla, to pou kapav ekout sa bann parol rekonfor la kan to dan silans, ouswa zis avan to al dormi. Kan to leve gramatin, res alonze e re-ekout seki to finn rikord. Demann Bondie donn twa lafors ki to bizin pou pas sa lazourne-la.
- **Pa ezite** pou partaz to lexperyans ar enn dimounn avek ki to pros. Reflesi ansam lor Laparol Bondie.
- **Retrouv** lasirans dan bann parol Zezi ki dir:

“Bienere zot ki andey, zot pou gagn konsolasion.”

Matie 5: 4

Mo dan sok e mo pa oule krwar

Dan bann premie zour to tristes, li posib ki to pou santi twa dan sok e to pa pou oule krwar seki finn arive. Sa enn reaksion normal kan enn dimounn ki nou kontan finn mor.

Garson bieneme Bondie ti mor lor enn lakrwa. Alor, Bondie kone ki to pe resanti. Repoz twa dan so Lamour touletan.

Mo leker akable e mo pe perdi kouraz

“Segner, to kone ki mo bann dezir ete. To tann mwa plengne ar douler; mo leker bate for-for, mo gagn febles e mo trouv som. Mo bann kamarad ek mo bann vwazin pe res lwin akoz mo bann tourman. Mo bann pros pe res enn distans... Segner, pa abandonn mwa; mo Bondie, pa res lwin ar mwa. Pa tarde pou sekour mwa, Segner, mo Sover.

Psom 38: 9 – 11, 2, 22

Mo nam refiz tou konsolasion

¹ Mo kriye for, “Bondie ed mwa!” Mo kriye for e Bondie tann mwa.
² Kan lavi pa fasil mo priye e rod sekour Leseigner; tout lanwit mo lev lame lao pou priye; me mo pa gagn rekonfor. ³ Ler mo pans Bondie, mo soupire; ler mo fer meditasion, dekourazman sezi mwa. ⁴ Aswar to pa les mo lizie ferme; traka anpes mwa koze. ⁵ Mo mazinn lepase; souvenir letan lontan. ⁶ Tout lanwit mo reflesi; mo medite e ala seki vinn dan mo latet: ⁷ “Eski Leseigner finn rezet nou pou touletan? Eski zame li pa pou favorab anver nou ankor? ⁸ Eski so lamour infini pou nou finn mor? Eski li finn ramas so promes pou debon? ⁹ Eski Bondie finn aret montre konpasion? Eski so koler finn ferm so leker?” ¹⁰ Apre mo dir momem, “Seki fer mwa plis dimal se kikfwa Bondie Pli Lao nepli servi so pouvwar dan nou faver.”

Psom 77: 1 – 10

Fer enn poz e demann tomem ...

Ki mo pe resanti? Eski mo gagn per pou koz li?

Eski parfwa mo santi mwa abandone kan mo pa kapav resanti prezans Bondie?

Enn letan pou plore

¹Lor sa later-la, ena enn sezon pou tou; enn letan pou sak kitsoz. ²Ena enn letan pou pran nesans, ek enn letan pou mor; enn letan pou plante, ek enn letan pou rekolte. ³Ena enn letan pou touye, ek enn letan pou geri; enn letan pou kraze, ek enn letan pou aranze. ⁴Ena enn letan pou plore, ek enn letan pou riye; enn letan pou andey, ek enn letan pou danse.

Eklezias 3: 1 – 4

To fer nou retourn lapousier

Lamor fer parti prosis natirel kreasion.

¹Segner, se twa ki finn touletan donn nou sekirite. ²Avan kreasion montagn, avan ki to ti fasonn later ek lemond, depi touzour e pou touzour twa ki Bondie. ³To fer dimounn retourn lapousier, to dir, "Imin, retourn kot to sorti!" ⁴Mil an pou twa li pa pli long ki enn zour ki finn fonn; oubien parey de-trwa ler-tan dan lanwit.

⁵To balie tousala, parey enn rev ki pase, parey kouma lerb ki ne gramatin, ⁶li fleri gramatin, grandi pandan lazourne e deperi ek mor aswar. ⁷To koler griye nou; To laraz terifie nou. ⁸To plas nou bann fot devan twa, dan lalimier to prezans okenn sekre pa sape. ⁹To koler koup-koup longer nou lavi ki tengn kouma enn soupir. ¹⁰Nou kapav viv swasanndis-an, katrovin si lasante bon, me se traka ek sagrin ki plin nou lexi-stans; bann lane pas vit e nou anvole ale.

Psom 90: 1 – 10

Fer enn poz e demann tomem ...

Kot mo tristes sorti? Kot mo sagrin vini? Kot Bondie ete kan mo santi mwa tris, kan mo deprime dan mo maler?

Kouma mo konpran koler Bondie?

Montre mwa sime-la

⁷Exos mo lapriyer, SEGNER! Mo finn perdi lespwar. Pa get lot kote, SEGNER; si to pa pran mwa kont, mo pou fini dan trou lamor. ⁸Toule gramatin fer mwa konn to lamour infini parski mo finn met mo konfians dan twa. Montre mwa sime ki mo bizin swiv parski mo finn tourn mwa ver twa.

Psom 143: 7 – 8

Koler ek resantiman

Kifer sa ariv mwa?

Dan to tristes, to kapav santi lakoler ek resantiman pe bwi dan twa. Li posib ki to ankoler kont Bondie parski lamor finn separ twa avek enn dimounn ki to kontan. Oubien, to panse ki tou finn abandonn twa lor sa sime difisil la, e to anvi blam kikenn pou lamor to pros.

Sa keston-la vinn sanses dan to panse : « Kifer ? »

Ninport ki to santiman ete, Bondie konpran twa. Sa bann santiman-la, zot bien natirel. Met to konfians dan Bondie. Limem ki pou ed twa travers sa bann moman difisil la.

Mo dan enn gran detres

⁹SEGNER, ena pitie pou mwa parski mo dan tourman; mo lizie bien fay parski mo larm finn bril li; mo lekor antie feb ek mo fatige; ¹⁰Gro sagrin finn rwinn mo lasante e larm pe ris mwa ver lamor. Mo bann tor finn afebli mwa e mo lezo pe deperi. ¹¹Mo lennmi, sirtou mo prop vwazin mepriz mwa; bann ki konn mwa zot per mwa; kan zot trouv mwa, zot sove al kasiet. ¹¹Dimounn finn fini bliye mwa, koumadir mo finn fini mor; mo initil kouma lasiet ki finn brize... ¹⁴Me mo met tou mo konfians an twa, O SEGNER; mo dir, "Twa ki mo Bondie."

Psom 31 : 9 – 12, 14

Mo ranferme dan mo sagra

¹SEGNER Bondie, mo Sover, tout lazourne mo kriy osekour; tout lanwit mo priye twa. ²Ekout mo lapriyer ki devan twa, tann mwa kriye osekour. ³Traka pe ranpli mo lavi; lamor pe koste kot mwa. ⁴Mo lor lalis bann ki ena enn lipie dan tom, mo parey enn dimounn ki nepli ena lafors. ⁵Mo koumadir kikenn ki finn abandone dan rwayom lamor; mo kouma bann solda mor ki finn zet dan fose, kouma kikenn ki to finn bliye net, ki to finn koupe net ar li. ⁶To finn rezet mwa dan fon trou lamor, dan finfon marenwar. ⁷To koler pez lour lor mwa, kouma gro-gro vag li kraz mwa. ⁸To finn fer mo bann kamarad abandonn mwa; aster zot get mwa ar degou. Miray otour mwa, mo pena sime sorti; ⁹soufrans ek larm finn afebli mo lizie. SEGNER, toulezour mo sipliy twa; mo lev lame ver twa pou dimann led.

Psom 88: 1 – 9

Fer enn poz e demann tomem:

Eski mo gagn linpresion ki bann dimounn pe evit mwa?

Eski bann kamarad, bann vwazin ek bann fami, zot tou finn abandonn mwa?

Bondie Toupwisan finn vir kont mwa

Apré lamor so mari ek so de garson dan pei Moab, Noemi ti krwar ki Bondie finn abandonn li. Li ti desid pou kit Moab e pou retourn Betleem dan zide. Li ti oule fors so de belfi, Rit ek Orpa, pou res dan Moab e pou retourn lakaz zot paran. Malgre sa, Rit ti desid pou swiv Noemi pou al Betleem.

Letan zot ariv laba, tou dimounn dan vilaz gagn enn gran lazwa aköz zot. Bann fam pe dir ant zot: “Ala Noemi!” Me Noemi dir zot: “Aret apel mwa Noemi (fam erez), apel mwa Mara (amertim), parski Bondie Toupwisan finn rann mo lavi bien amer.

Mo ti ale lame plin, me LESEGNER finn retourn mwa lame vid. Kifer zot kontign apel mwa Noemi? Zot pa trouve LESEGNER finn fer mwa ditor? Bondie Toupwisan finn fer mwa gagn maler lor maler.”

Rit 1: 19b – 21

Fer enn poz e demann tomem:

Ki mo panse lor rezonnman Noemi? Eski Bondie ti azir kont li avek severite? Eski parfwa mo trouv momem pe blam Bondie pou lamor enn dimounn ki mo bien kontan?

Mo leker tro amer, mo bizin fer mo konplint

Zob, enn bon dimounn, ki ti perdi tou so zanfan ek so dibien, ti ouvertman exprim so koler kont Bondie:

Ayo Bondie, pa bliye ki mo lavi, li zis enn souf. Zame mo lizie pa pou trouv leboner ancor. Twa ki pe vey lor mwa, to pou nepli trouv mwa; to pou rod mwa, me mo pou nepli la. Parey kouma enn niaz fane e disparet, bann ki desann dan lamar, disparet e zame pa remonte. Sa dimounn-la zame pou retourn dan so lakaz, e personn pa pou rapel li. Akoz sa, mo pa pou ferm mo labous. Mo pou koze parski mo lespri dan langwas; Mo pou plore parski mo nam dezespere. Kifer to vey mwa koumsa? Eski mwa mo losean, oubien enn mons dan lamer? Kan mo al dormi, mo dir, “mo ava gagn inpe konsolasion lor mo lili, mo somey ava soulaz mo tristes.” Me twa, to teroriz mwa ar bann kosmar; to fer mwa gagn freyer ar bann vizion. Vomie to ti finn trangle mwa; Prefer mo mor ki mo viv kouma enn eskelet.

Mo finn nepli kapav. Mo pa pou viv pou lontan ankò. Les mwa trankil, parski mo lavi kouma enn souf. Ki imin ete pou ki to donn li otan linportans? Wi, kifer to pran zot traka koumsa? Toule gramatin to vinn examinn zot; toulezour to vinn teste zot. Kan to pou arete vey mwa koumsa? Donn mwa letan pou aval mo lakras. Si mo finn fer pese, ki mo kapav finn fer twa, Gardien limanite? Kifer to viz zis mo tousel? Eski mo finn vinn enn fardo pou twa? Kifer to pa pardonn mo pese ek efas mo erer? Aster-la mo pou desann dan lapousier; to pou rod mwa, me mo pou nepli la.

Zob 7: 7 – 21

Pran enn moman e poz tomem sa kestion-la:

Eski bann santiman Zob resanble seki pou mwa? Eski kapav konpar zot avek seki pou mwa? Eski mo anvî repros Bondie? Eski mo fer kosmar dan mo somey? Eski ena kikenn ki ti pou dispoze ekout mwa exprim mo bann santiman?

Mo inplor LESEGNER

¹Avek tou mo lafors mo dimann LESEGNER ed mwa; avek tou mo lafors mo sipliy LESEGNER. ²Mo rakont li tou mo problem; mo dir li tou mo traka. ³Kan mo nepli ena kouraz, to kone ki mo bizin fer. Lor mo larout, mo lennmi finn instal piez partou. ⁴Ler mo get otour mwa, mo pa trouv personn pou protez mwa, personn pou donn mwa enn koudme pou kasiet. Person pa pran kont mo lavi. ⁵SEGNER, mo sipliy twa vinn ed mwa. Mo dir twa, "Tomem mo protekter; tomem mo trezor lor later bann vivan. " ⁶Ekout mo lapriyer dezespwar, aköz mo finn afebli.

Psom 142: 2 – 7a

Fer enn poz e demann tomem:

Eski mo santi mwa delese? Eski mo santi mwa abandone par mo bann kamarad, mo bann vwazin ek mo bann fami?

Lespri intersede

Labib dir ki Lespri Sin pou ed twa priye. Mem si to pa kone kifer bizin priye, Bondie konn tou seki to bizin.

²⁶Dan mem manier Lespri vinn ed nou dan nou febles, parski nou pa konn priye kouma bizin, me Lespri limem intersed pou nou par bann soupir ki pa kapav exprime par okenn parol. ²⁷Bondie ki kapav lir dan nou leker, li kone ki ena dan panse Lespri, parski Lespri intersed pou bann krwayan dapre volonte Bondie.

Romin 8: 26, 27

Fer enn poz e demann tomem:

Eski parfwa mo anvi priye me mo pa kone ki pou dir?

Eski mo finn eseye zis res trankil ek ekout lavwa Bondie?

Kilpabilite ek douler

“Mo ti bizin finn fer plis”

Dan to soufrans, lapenn ek tristes ki to resanti kapav pous twa pou repros tomem.

“Dedir, si mo ti finn fer sesi!” oubien “Mo ti bizin finn fer sa!”

Parfwa, li bien difisil pou rekonet bann kiksoz ki nou pa kone kifer arive. Kapav arive osi, ki to pou gagn santiman ki to finn bliye fer sertenn kiksoz. Ninport ki sirkonstans-la ete, Bondie avek twa dan sa moman kot to pe esey metriz to bann santiman kilpabilite. Tourn twa ver Bondie. Li kontan twa e li finn fini pardonn twa. Limem ki pou apez to douler.

Mo leker finn kase

²¹SEGNER, mo Segner, ed mwa pou loner to nom; parski to lamour infini telman bon, sov mwa. ²²Mo pov; mo enn malere; mo blese dan profonder mo leker.

²³Mo lavi pase, kouma lonbraz letan aswar aprobe; kouma sotrel ki divan siklonn souffle kot li anvi. ²⁴Telman mo pa finn manze, mo zenou pe tranble; mo finn vinn lapo-lezo. ²⁵Kan dimounn trouv mwa zot sikann mwa; zot sakouy latet pou montre zot mepriz mwa. ²⁶Ed mwa, SEGNER, mo Bondie! Parski to lamour li infini, sov mwa!

Psom 109: 21 – 26

Fer enn poz e demann tomem:

Eski mo pe priv momem manze ki mo lekor bizin?

Eski mo pe nourri mwa ase?

Eski mo santi ki mo leker finn kase?

Eski bann dimounn pe kritik mwa akoz mo dan tristes?

Kifer pa mwa ki ti finn mor dan to plas?

Alor, lerwa David ti akable. Li ti al dan lasam ki ti trouv par lao laport lavil pou li plore. Anmemtan ki li ti pe marse, li ti kriye:

Ayo, mo garson Absalom, mo garson, mo garson! Ayo, mo Absalom! Kifer mo pa ti mor dan to plas? Ayo Absalom, mo garson, mo garson!

Ti finn dir Zoab ki lerwa ti pe kriye for-for e ti pe plore pou so garson Absalom. Sa zour-la, olie ki bann solda ti selebre laviktwar, zot ti akable ar tristes. An-efe, zot ti aprann ki lerwa ti finn afekte par lamor so garson.

Zot ti rant dan lavil lor vites, kouma bann solda onte ki finn abandonn enn batay. Lerwa ti finn kouver so figir avek enn vwal. Li ti pe kriye for-for: Ayo! Mo garson Absalom! Ayo Absalom, mo garson, mo garson!

2 Samiel 19: 1 – 4

Pran enn moman e poz twa sa kestion-la:

Ki bann santiman kontradiktwar ki mo pe resanti konsernan lamor sa dimounn ki mo bien kontan la? Kouma mo kapav exprim seki mo pe resanti dan enn meyer fason?

Dimande e to pou gagne

Zezi asir nou ki Bondie oule donn nou bann bon kiksoz.

“⁷Dimande, e to pou gagne, rode e to pou trouve, tape e laport pou ouver pou twa. ⁸Parski tou dimounn ki dimande pou resevwar, seki rode pou trouve, e laport pou ouver pou seki tape. ⁹Kisann-la parmi zot, ki si so garson dimann dipin, li donn li enn ros; ¹⁰si li dimann pwason, pou donn li enn serpan? ¹¹Move kouma zot move, zot kone kouma donn bon kado zot zanfan, alor ki kantite bon kiksoz anplis zot Papa ki dan lesiel pou donn zot kan zot dimann li.”

Matie 7: 7 – 11

Aret twa enn moman e demann tomem:

Ki mo ti anvi demann Bondie aster-la? Eski mo bizin krwar ki Bondie ekout ek exos mo lapriyer, mem si mo pa gagn seki mo finn demande?

Mo pe kriy ver twa, O Eternel

¹Depi deeper mo dezespar mo kriye twa, SEGNER. ²O Segner, tann mo lavwa! Ekout mo lapriyer, mo sipliy twa ed mwa! ³SEGNER, si to ti gard enn lalis tou nou pese, kisann-la ti pou kapav res dan to prezans? ⁴Akoz to aksepte pardonn nou, nou dwa twa respe ek reverans. ⁵Avek inpasians mo atann led LESEGNER e mo lesperans li dan so parol. ⁶Avek inpasians mo pou atann larive Lesegner plis ki gardien-aswar esper gramatin vini. Wi! Plis ki gardien-aswar esper gramatin vini.

Psom 130: 1 – 6

A Bondie, pitie mwa

¹Ena pitie pou mwa, Bondie, dan to gran lamour infini. Dan to gran mizerikord efas tou mo pese. ²Lav mwa, retir tou mo bann fot, pirifie mwa, retir mo bann pese.

³Mo rekonet mo bann tor; mo bann pese touzour divan mo lizie. ⁴Kont twa, kont to tousel ki mo finn fer pese, e mo finn al fer seki to konsider lemal. To ena rezon trouv mwa koupab. Santans ki to prononse, li zis.

⁸Fer mwa re-gagn lazwa ek boner; e ki lezo ki finn kas-kase retrouv zot lazwa.

⁹Aret get mo bann pese, efas tou bann fot dan mwa. ¹⁰Bondie, kree dan mwa enn leker pir ek prop, renouvel dan mwa enn lespri nouvo ek lwayal. ¹¹Pa avoy mwa lwin ar twa; pa ras to lespri sin ki dan mwa. ¹²Re-donn mwa lazwa ki enn peser gagne kan to sov li; donn mwa enn lespri obeisans, pou soutenir mwa.

¹⁴Kot ena disan verse, sov mwa, Bondie, Bondie mo liberater, e mo pou dir for-for ki tomem vre drwatir. ¹⁵Segner, rann mwa laparol pou ki mo kapav sant to louanz.

Psom 51: 1 – 4, 8 – 12, 14, 15

Aret twa enn moman e dimann tomem:

Eski parfwa mo gagn linpresion ki Bondie finn rezet mwa? Eski ena kiksoz ki mo finn fer, oubien ki mo pa finn fer, pou lekel mo ti anvi ki Bondie pardonn mwa? Eski mo kapav rekoumans viv? Eski mo finn pare pou rekoumans loue Bondie?

⁹Leker LESEGNER li ranpli ar konpasion ek pitie; difisil pou li fer koler parski so lamour infini deborde partou. ⁹Li pa fer akizasion lor akizasion, e so koler osi tengn bien vit. ¹⁰Li pa tret nou dapre nou pese, li pa pini nou dapre nou bann fot. ¹¹So lamour infini pou dimounn ki onor li, li osi ot ek gran ki lesiel ete konpare ar later. ¹²Li separ nou ar nou pese parey distans ki ant soley leve ek soley kouse. ¹³Parey kouma enn papa ena konpasion anver so zanfan LESEGNER ena konpasion anver bann ki onor li. ¹⁴Li bien kone kouma ti form nou; li kone ki nou sorti dan lapousier. ¹⁵Bann imin zot lavi kouma lerb. Zot grandi ek fleri kouma fler sovaz; ¹⁶ler labriz soufle, tou petal fane, personn pa rapel kot so plas ti ete. ¹⁷Depi touzour ziska touzour LESEGNER ena enn lamour infini pou bann ki onor li; e so fidelite pou dire pou zanfan zot zanfan; ¹⁸so bonte beni dimounn ki respe so lalians e ki obeir so bann komannman.

Psom 103: 8 – 18

Aster-la to kapav dimann tomem:

Eski mo kapav aksepté Lamour ek pardon inkondisionel Bondie? Eski mwa osi mo kapav ranpli ar konpasyon ek pitie pou lezot, parey kouma Bondie ete anver mwa?

Leboner ek lagras pou akonpagn mwa

Lesegner, limem berze

¹LESEGNER limem mo berze; akoz sa mo pa mank nanye. ²Li amenn mwa repoze dan patiraz lerb tann; li gid mwa kot rwise dilo trankil, ³pou mo regagn lavi; li kondir mwa lor bon sime pou loner so nom.

⁴Mem kan mo travers vale bien som, parey lamor, nanye pa fer mwa per parski to touletan la koste ar mwa, ar to baton berze to protez mwa.

⁵To dres latab pou mwa divan mo bann adverser. To vers delwil parfime lor mo latet pou resevwar mwa ar loner, e to plin mo koup ziska li deborde. ⁶Mo kone ki to bonte ek to lamour pou akonpagn mwa toulezour mo lavi, e mo pou res dan lakaz mo SEGNER osi lontan ki mo viv.

Psom 23

Aret twa enn moman e poz twa sa kestion-la:

Eski mo resanti prezans Bondie kan mo mars dan vale bien som? Eski mo laper finn diminie par prezans mo Berze, e osi prezans mo fami ek mo bann kamarad?

Solitud ek laper

Ki mo pou fer aster-la?

Dan to sagrin, to kapav santi twa tousel e abandone par Bondie. Pas letan tousel avek to bann santiman kapav ed twa. Me atansyon! Solitud ek laper kapav fer twa repliy lor tomem pandan enn long letan. Lerla, sa kapav elwagn twa avek bann dimounn ki pe anvè ofer twa zot led ek zot soutien.

To kapav osi, dapre leta to lasante, gagn bann sintom detres, kouma:

- Perdi lapeti
- Enn mank lintere pou seki pe pase otour twa
- Difilite pou gagn somey
- Malad latet
- Lestoma debalanse
- Tansyon for
- Latet vid
- Anxiete
- E mem bann panse swisider

Li inportan ki to rod enn lavi medikal si to ena enn ouswa lot sa bann sintom-la. Anmemtan, sa pou ed twa si to kapav konfie twa ar enn dimounn avek ki to ena konfians.

Bondie sansib ar to sagrin, mem kan to dan enn gran dezespar.

Bondie, Bondie, kifer to finn abandonn mwa?

Dapre so bann dernie parol lor lakrwa, Zezi, limem, ti santi ki Bondie finn abandonn li.

³³Ler finn ariv midi, teneb kouver later antie ziska trwa-z-er tanto. ³⁴Trwa-z-er, Zezi kriy bien-bien for, “Eli, Eli, la-ma sabaktani?” - savedir, “Bondie, Bondie, kifer to finn abandonn mwa?” ³⁵Letan de-trwa dimounn ki ti la, tann li, zot dir, “Tande! Li pe apel Eli.” ³⁶Enn parmi zot galoupe, inbib enn leponz ar vineg, met li dan bout enn banbou e donn Zezi sa pou bwar, e li dir, “Atann, anou gete si Eli pou vini, pou fer li desann.” ³⁷Aprè sa, Zezi kriye bien for e li rann so dernie soupir.

Mark 15: 33 – 37

Lizour mo sipliy twa ed mwa, me san repons ...

¹Bondie, mo Bondie, kifer to finn abandonn mwa? Dan dezespar mo kriye osekour, me to sekour pa vini. ²Mo Bondie, lizour mo sipliy twa ed mwa, me san repons; lanwit mo kriye, mo pa gagn okenn repo.

³Pourtan tomem sel Bondie ki Sin; to lor to tron, omilie louanz lepep Izrael.

⁴Nou bann anset ti met zot konfians total dan twa; zot ti fer twa konfians e to ti delivre zot. ⁵Zot ti sipliy twa vinn ed zot, e to ti sov zot; zot lafwa ti dan twa e zame zot ti regrete.

⁶Me mwa, pa kapav dir mo enn imin; mo kouma enn lever; bann dimounn insilte mwa, lepep rezet mwa. ⁷Tou dimounn mepriz mwa, mok mwa; zot boufonn mwa, zot fer grimas. ⁸Zot dir, "Get li! Li fer konfians LESEGNÉ! Kifer to Bondie pa vinn delivre twa? Si li kontan twa kifer li pa vinn ed twa?"

⁹Pourtan Bondie, twa ki ti ed mwa travers lakousman; twa ki ti poz mwa an sekirite pre kot leker mo mama. ¹⁰Depi mo nesans finn konfie mwa dan to lame; depi dan vant mo mama tomem mo Bondie. ¹¹Bondie, pa res lwin ar mwa. Traka ek danze pe koste. To tousel kapav ed mwa.

¹⁴Mo lafors pe ale, pe koule kouma dilo; tou bann lezo dan mo lekor finn disloke net, e mo leker kouma lasir, li pe fonn dan mwa. ¹⁵Mo labous sek; mo lalang tas ar mo pale; mo lagorz amare. Koumadir to finn larg mwa dan lapousier lamor!

¹⁶Bann lisien pe tom lor mwa; enn group kriminel finn anserkle mwa, zot pers mo lame mo lipie. ¹⁷Mo finn vinn lapo-lezo, tou mo lezo deor; dimounn fixe zot regar lor mwa; ¹⁸mo lennmi pe lager pou gagn mo linz; zot tir lakourtpay. ¹⁹Me twa, SEGNER, pa res lwin ar mwa! Vini vit, vinn sov mwa, twa mo lafors!

Psom 22: 1 – 11, 14 – 19

Aret enn moman e poz twa sa kestion-la:

Eski mo santi mwa tousel? Eski mo gagn linpresion ki bann dimounn ki otour mwa pa konpran mwa? Eski mo gagn linpresion ki sa bann dimounn-la pa kas latet ar mo sagrin? Eski telman mo finn abat, mo gagn linpresion ki mo imanite finn pran enn kou? Eski bann dimounn pe dir: Li finn gagn seki li merite?"

Mo nam rod to prezans mo Bondie

¹Parey kouma serf rod dilo kler larivier, mwa mo rod to prezans, mo Bondie.

²Mo swaf pou Bondie, Bondie vivan. Kan mo pou kapav rant dan to lakaz pou prezant mwa devan twa, pou ador twa? ³Lanwit-lizour mo plore; zis larm ki plin mo vant. Letansa mo bann lennmi persiste dir, “Kot to Bondie ete?”

Psom 42: 1 – 3

LESEGNER pa rezet personn pou touzour. Mem si li permet ki dimounn soufer, li res touzour plin ar Lamour, parski so bonte bien gran. Li pa pran plezir pou imilie bann imin e pou fer zot soufer.

Lamantasion 3: 31 – 33

LESEGNER pou avek twa

¹Aster-la, LESEGNER pe koze, limem ki finn kree twa Zakob, limem ki finn fasonn twa Izrael. Napa gagn per, parski mo finn liber twa. Mo finn apel twa par to nom: twa, to tou pou mwa. ²Si to travers lamer, mo pou avek twa, e bann larivier napa pou nway twa. Ler to pou pas dan dife, to pa pou brile, e laflam pa pou bril twa.

Izai 43: 1 – 2

... To pou trouv enn plas kasiet

Pa dout bann promes Bondie

¹Ninport kisann-la ki ena proteksion Bondie Pli Lao, ninport kisann-la ki res dan lonbraz Bondie Toupwisan, ²li kapav dir LESEGNER, “Tomem mo labri ek mo fortres. Tomem mo Bondie ki mo fer konfians.” ³Li pou protez twa kont latrap bann saser, kont ninport ki lepidemi mortel. ⁴Ar so lezel li pou kasiet twa; anba so lezel to pou an sekirite; so fidelite parey enn boukliye ek enn zarm protekter. ⁵To nepli pou bizin per danze aswar ouswa bann latak antret dan lazourne ⁶ouswa bann lepidemi ki atake dan nwar ouswa lemal ki tom lor nou anplin lizour.

¹⁴Bondie dir, “Mo pou sov bann ki kontan mwa; Mo pou protez bann ki rekonet mo nom. ¹⁵Kan zot dimann led, zot pou gagne; kan zot dan detres, mo pou soutenir zot. Mo pou sov zot, mo pou onor zot. ¹⁶Mo pou fer zot viv lontan; e donn zot garanti ki momem zot sover.”

Psom 91: 1 – 6, 14 – 16

Pran enn moman e demann tomem:

Ki bann promes Bondie ki donn mwa konsolasion?

Eski vmem Bondie enn protekter ek enn boukliye pou mwa?

Zezi asir so bann disip ki zame li pa pou abandonn bann dimounn ki swiv li.

¹⁸Mo pa pou les zot orfelin; mo pou revini. ¹⁹Dan enn tigit letan ankor, lemond nepli pou trouv mwa me zot, zot pou kontigne trouv mwa parski mo pou viv e zot osi zot pou viv. ²⁰Sa zour-la, zot pou kone ki mo dan mo Papa e ki zot dan mwa e ki mwa, mo dan zot.

²¹Seki gard mo bann komannman e met zot an pratik, mo kone ki li kontan mwa; seki kontan mwa, mo Papa pou kontan li e mwa, mo pou kontan li osi e li pou kone ki mo ete vmem.”

²²Zida (pa Zida Iskaryot) dir, “Segner, kouma to kapav dir ki to pou fer nou konn twa vmem alors ki to pa pou fer lemond konn twa?” ²³Zezi reponn, “Si

vremem kikenn kontan mwa, li pou met mo parol an pratik, mo Papa pou kontan li, nou pou vinn kot li e nou pou fer nou lakaz kot li.

Zan 14: 18 – 23

Pa bouverse, pa gagn per

²⁵Mo finn dir zot tousala parski mo ankor avek zot. ²⁶Me Sa-Enn ki pou defann zot la, limem Lespri Sin ki mo Papa pou avoy lor mo nom. Li, li pou montre zot tou kiksoz e li pou fer zot rapel tou seki mo finn dir zot. ²⁷Shalom, mo donn zot mo lape, pa manier lemond me dan mo manier. Pa bouverse, pa gagn per.

Zan 14: 25 – 27

Gerizon ek nouvo lavi

“Mo pou ranpli ar lesperans!”

Sa gran sagrin ki to pe viv la, li pa respekte okenn orer. Bann santiman dout, koler, kilpabilite, laper ek solitid kapav dire plizir semen, e mem plizir mwa. Kan to resanti to sagrin plennman, sa pou ed twa sirmont to lapenn. Apresie bann bon souvenir ki to ena pou to bieneme e pa anpes to sagrin vini. Apre sa gerizon pou koumans vini. Met to tristes dan lame Bondie e sak zour li pou donn twa lesperans ek lafors pou avanse.

“Leseigner, limem mo trezor”

Bann bonte LESEIGNER zame pa fini. So Lamour pena limit. Li renouvle so bonte toule gramatin. Vremem to fidelite bien gran, SEIGNER! Ala mo dir: LESEIGNER, limem mo trezor, aköz samem, mo finn met mo lesperans dan li.

Lamantasion 3: 22 – 24

Enn nouvo nesans ek enn nouvo lavi atraver Lespri Sin

⁴Me kan Bondie nou Sover finn montre so bonte ek so lamour pou dimounn, ⁵li finn sov nou. Pa akoz nou bann bon aksion me par so mizerikord. Li finn sov nou atraver delo ki donn enn nouvo nesans ek enn renouvelman par Lespri Sin. ⁶Bondie finn repann an abondans Lespri Sin lor nou atraver Zezi Kris nou Sover, ⁷e kan li rann nou zis par lagras, nou gagn dan lesperans leritaz lavi eternal.

Tit 3: 4 – 7

Viv enn nouvo lavi

³Zot pa kone ki nou tou ki finn batize dan Lekris nou finn batize dan so lamor?

⁴Par nou batem nou finn antere avek li e nou finn partaz so lamor, pou ki nou viv enn nouvo lavi parey kouma Lekris finn resisite depi lamor par laglwar so Papa. ⁵Si nou finn ini avek li dan enn lamor parey kouma so lamor, nou pou ini avek li dan so rezireksion. ⁶Nou kone ki nou vie natir finn krisifie ansam ar li, pou ki sa lekor pese la perdi tou so pouvwar, e ki nou nepli pou esklav pese.

⁷Pou dimounn ki finn mor, pese pena okenn pouvwar lor li. ⁸Si nou finn mor avek Lekris, nou krwar avek konviksion ki nou pou viv avek li. ⁹Parski nou kone ki depi ki li finn resisite, Lekris pa pou mor ankor; lamor nepli ena pouvwar lor li. Bizin kit nou fardo kot lakrwa. ¹⁰Akoz li finn mor, pese finn perdi tou pouvwar lor li. Pou samem pese li finn mor enn fwa pou tou; aster-la ki li vivan, li viv so lavi pou Bondie.

¹¹Dan mem fason, konsider zotmem mor par rapor ar zot pese, me vivan pou Bondie dan linion avek Zezi Kris.

Romin 6: 3 – 11

Fer enn poz e demann tomem:

Eski mo gagn linpresion ki Bondie pe donn mwa lokazion pou enn renouvo ek enn nouvo lavi? Ki bann modifikasion mo bizin fer dan mo lavi?

“... Mo pou prepar enn plas pou zot”

Met to lesperans dan Zezi. Limem sime, laverite ek lavi.

¹“Pa bizin zot bouverse; krwar dan Bondie, krwar osi dan mwa. ²Dan lakaz mo Papa ena boukou plas, sinon mo pa ti pou dir ki mo pe al prepar enn plas pou zot! ³Kan mo pe ale mo pou al prepar enn plas pou zot; apre sa mo pou revini e mo pou vinn sers zot e la kot mo pou ete, zot osi, zot pou ete.

⁴Zot kone sa sime kot mo pe ale la.” ⁵Lerla Toma dir, “Segner nou pa kone kot to pe ale; be kouma nou kapav kone ki sime bizin pase?” ⁶Zezi dir li, “Momem sime, laverite, lavi; personn pa kapav al kot mo Papa si li pa pas par mwa. ⁷Si zot ti konn mwa, zot ti pou konn mo Papa osi. Aster-la, zot konn mo Papa e zot finn trouv li.”

Zan 14: 1 - 7

Fer enn poz e demann tomem:

Ki lefe bann parol Zezi ena lor mwa? Kouma mo trouv lavenir?

... Tou pou reviv an Kris

Pol donn garanti ki bann mor pou regagn lavi, parski Kris finn vink lamor.

¹²Me si nou anons ki Lekris finn resisite parmi bann mor, alor kouma ena parmi zot pe dir ki pena rezireksion bann mor?

¹³Si pena rezireksion bann mor, alor dan sa ka-la mem Lekris pa finn resisite. ¹⁴E si Lekris pa finn resisite, nou predikasion pena sans, e zot lafwa dan vid.

²⁰Me non; Lekris finn resisite depi bann mor, limem premie resisite. ²¹Parey kouma lamor finn arive par enn zom, parey rezireksion finn arive par enn zom.

²²Tou bann dimounn mor parski zot lie ar Adam; dan Lekris tou pou gagn lavi.

1 Korintien 15: 12 – 14, 20 – 22

“Lamor finn anglouti dan laviktwar”

⁵⁰Seki mo pe rod dir, frer ek ser, se ki laser ek disan pa kapav ena par dan Rwayom Bondie; seki mortel pa kapav ena par dan imortalite. ⁵¹Mo pou revel zot enn sekre: pa nou tou ki pou mor, me nou tou, nou pou sanze ⁵²dan enn miliem segonn, pa gagn letan bat lizie, kan tronpet final sone. Letan tronpet sone bann mor pou resisite, e zame pou mor ankor; e nou, nou pou transforme. ⁵³Sa lekor ki kapav pouri la, bizin abiy ar seki pa pouri zame; sa lekor ki kapav mor la, bizin anvlop li dan seki pa pou mor zame. ⁵⁴Kan seki kapav pouri pou anvlope ar seki pa pouri zame, e letan seki kapav mor pou anvlope ar seki pa mor zame, lerala Lekritir pou realize kot finn dir: “Lamor finn anglouti dan laviktwar.”

⁵⁵“Lamor, kot to laviktwar ete?

Lamor, kot to pouvwar donn douler ete?”

⁵⁶Douler lamor vinn depi pese ki ena pouvwar donn lamor, e pwisans pese sorti depi lalwa. ⁵⁷Granmersi Bondie ki donn nou laviktwar atraver nou Segner Zezi Kris.

1 Korintien 15: 50 – 57

Poz enn moman e demann tomem:

Eski mo finn deza panse kan apepre mo pou resisite?

Eski sa panse-la kapav sanz fason ki mo anvi viv aster-la?

Lesegner Bondie pou souy tou larm ki dan lizie...

Letan pou vini kot pou nepli ena lamor.

⁶LESEGNER Toupwisan pou fer enn gran fet lor sa montagn-la pou tou bann pep, enn gran repa avek laviann bien gra, bien fondan, ek bon-bon divin. ⁷Li pou tir lor montagn-la vwal ki ti anpes bann pep trouv kler ek latwal dey ki ti pe kouver tou bann pei. ⁸Li pou detrir lamor pou touzour. LESEGNER Bondie pou souy bann larm lor tou figir, li pou met dekote dezoner so pep lor later antie. Ala seki LESEGNER finn dir.

⁹Sa zour la, dimounn pou dir: “Limem nou Bondie. Nou finn fer li konfians, e li finn sov nou. Limem LESEGNER! Nou finn kont lor li. Anou kriye nou lazwa, anou fer enn fet, parski li finn sov nou. ¹⁰Lame pwisan LESEGNER pou protez sa montagn-la.”

Izai 25: 6 – 10a

Poz enn moman e demann tomem:

Ki mo trouve kan mo lir seki finn dekrir dan sa pasaz-la? Mo sagrin pe koumans diminie, eski mo kapav angaz mwa dan bann aktivite avek lezot? Ki mo bizin fer pou ki sa arive?

Pa pou ena ni lamor, ni dey, ni lamantasion, ni douler

¹Apré sa, mo ti trouv enn nouvo lesiel ek enn nouvo later; ofet premie lesiel ek premie later ti finn disparet e lamer ti nepli existe. ²E mo ti trouv lavil sin, nouvo Zerizalem, sorti kot Bondie e desann depi lesiel. Li ti bien abiye parey kouma nouvel-marye pe atann so bieneme.

³E mo tann enn lavwa for depi tronn ki pe dir, “Aster-la, lakaz Bondie li omilie so pep! Li pou res avek zot e li pou vinn zot Bondie. ⁴Li pou souy tou larm dan zot lizie. Pa pou ena ni lamor, ni dey, ni lamantasion, ni douler. Tousala parski vie lemond finn disparet.”

⁵Seki ti asiz lor tronn-la dir, “Mo pe fer tou kitsoz nef!” Apre li dir, “Ekrir sa, parski sa bann parol-la zot sir ek vre.” ⁶Lerla li ti dir mwa, “Fini aster-la! Momem Alfa ek Omega, koumansman ek lafin. Dimounn ki gagn swaf, mo pou donn zot delo lasours lavi ki pa pou kout zot nanye. ⁷Dimounn ki gagn laviktwar pou resevwar sa don-la, e mo pou vinn so Bondie e li pou vinn mo zanfan.

Revelasion 21: 1 – 7

Poz enn moman e demann tomem:

Etan done ki enn zour mo pou abit avek Bondie, kouma mo bizin konport mwa isi lor later?

Kisann-la kapav separ nou ar lamour Lekris?

Lamour Bondie an Kris pou ed twa sirmont tou difikilte.

³¹Alor ki nou kapav dir lor sa size-la? Si Bondie avek nou, kisann-la kapav kont nou? ³²Li pa finn epargn so prop Garson, me finn livre li pou nou; si li pe donn nou so prop garson, eski li pa pou donn nou tou seki bizin par so lagras?

³³Kisann-la kapav met sarz lor seki Bondie finn swazire davans? Bondie limem deklar zot pa koupab! ³⁴Kisann-la kapav kondann zot? Personn. Parski Lekris limem ki ti mor, me plis ki sa, li finn resisite e li adrwat Bondie pou interted pou nou. ³⁵Kisann-la kapav separ nou ar lamour Lekris? Eski lasoufrans kapav fer sa, oubien langwas, persekision, lafaminn, lamizer, danze, oubien lamor?

³⁶Parey kouma finn ekrir:

“Akoz twa nou dan danze lamor toulezour,
tret nou kouma mouton ki pou egorze dan labatwar.”

³⁷Me dan tousala, nou plis ki vinker par Sa-Enn ki finn kontan nou la. ³⁸Wi, mo ena lasirans ki ni lamor, ni lavi, ni bann anz, ni lezot pouvwar dan lesiel, ni letan prezan, ni lavenir, ³⁹ni bann lafors lao, ni bann lafors anba, ni okenn lot kiksoz dan kreasion, pa pou kapav separ nou ar lamour ki Bondie ena pou nou dan Kris Zezi nou Segner.

Romin 8: 31 – 39

Aret twa enn moman e demann tomem:

Kouma mo kapav selebre pli bien, laviktwar ki finn dekrir dan sa pasaz-la?

“Momem larezireksion ek lavi”

Zezi dir:

Momem larezireksion, momem lavi; dimounn ki krwar dan mwa pou viv mem si li finn mor. Tou dimounn ki viv e krwar dan mwa zame pou mor.

Zan 11: 25 – 26a

Aksepte seki finn arive e gagn lape

“Mo pou loue Bondie!”

To sagrin pou kapav dire inpe letan, me enn zour li pou disparet. Pli inportan ki to sagrin ek to lapenn, lavi pe atann twa. Kominote legliz pe akey twa lebra ouver, avek Lamour.

Si to santi twa pli for akoz lexpéryans to soufrans, ena bann mwayin pou to ed lezot ki dan to legliz ouswa dan to kominote ki pe pas par bann moman difisil. Ki konpasion Bondie diriz to leker, to panse, ek donn twa lape!

... Tomem lasours lavi

⁸ Dan labondans to lakaz, to konble zot ar manze, zot bwat dan larivier to bonte. ⁹Tomem lasours lavi e to lalimier ekler nou lavi.

¹⁰Donn to lamour dimounn ki rekonet to grander e lazistis bann ki ena leker drwat.

Psom 36: 8 – 10

Mo finn vini pou ki zot gagn lavi ...

⁷Alors Zezi dir zot ankor, “Vremem laverite mo dir zot, momem laport bann mouton. ⁸Tou bann seki finn vinn avan mwa, bann voler, bann bandi e bann mouton pa finn ekout zot. ⁹Momem laport; seki pas par mwa, mo pou sov li, li pou kapav rantre-sorti kouma li anvi e pou touzour ena patiraz pou li. ¹⁰Voler vini zis pou kokin, touye ek detrir; mwa, mo finn vini pou zot gagn lavi, e pou ki zot gagn li an abondans. ¹¹Momem bon berze; enn bon berze expoz so lavi pou so bann mouton.

¹²Dimounn ki travay zis pou kas pa enn berze; bann mouton-la pa pou li. Kan li trouv loulou vini, li kit mouton, li sove, li ale. Lerla loulou trap zot e farous zot.

¹³Li sove parski li travay zis pou kas e li pa pran kont bann mouton. ¹⁴Momem bon berze, mo konn mo brebi e mo brebi konn mwa. ¹⁵Kouma mo papa konn mwa, e mwa mo konn mo papa, mo pare pou donn mo lavi pou mo bann brebi.

¹⁶Mo ena lezot mouton ankor me zot pa ankor dan sa park-la; mo bizin al rod zot osi e zot pou ekout mo lavwa.

Lerla pou ena enn sel troupo ek enn sel berze. ¹⁷Akoz samem mo papa kontan mwa parski mo expoz mo lavi. Kan mo expoze, mo re-gagn lavi ankor. ¹⁸Personn pa pran mo lavi; mo donn mo lavi par momem; mo ena pouvwar donn li, parey kouma mo ena pouvwar rebran li. Mo finn resevwar sa pouvwar-la ar mo papa.”

Zan 10: 7 – 18

... Zame zot pa pou perdi

²²Ti fet Konsekrasion Tanp Zerizalem. Ti liver. ²³Zezi ti dan Tanp e li ti pe ale-vini anba galri Salomon. ²⁴Bann Zwif antour li e zot demann li, “Ziska kan to pou gard nou dan sispan? Dir nou enn fwa si tomem Lemesi?” ²⁵Zezi reponn zot, “Mo finn deza dir zot, zot pa’le krwar mwa; bann travay ki mo fer lor nom mo Papa rann temwaniaz lor mwa, ²⁶me zot pa krwar parski zot pa form parti mo bann brebi. ²⁷Mo brebi tann mo lavwa, mo konn zot e zot swiv mwa.

²⁸Mo donn zot lavi eternal, e zame zot pou mor. Personn pa pou kapav tir zot dan mo lame. ²⁹Mo Papa ki finn donn mwa bann brebi-la, li pli gran ki tou e personn pa pou kapav ras zot dan lame mo Papa. ³⁰Mo Papa ek mwa nou enn sel.”

Zan 10: 22 – 30

Fer enn poz e demann tomem

Kouma mo kapav dekrir mo lavi aster-la? Ki kiksoz ki plis okip mo letan? Eski ena enn vid dan mo lavi? Ki mo fer pou ranpli sa vid-la?

... Fer tou dan nom Segner Zezi ...

¹²Zot, zot bann ki Bondie finn swazir, finn sanktifie, finn kontan, alor met dan zot leker bann santiman konpasion, bienveyans, imilite, douser, pasians.

¹³Siport zot kamarad, e si zot ena kit repros, donn zot pardon; kouma Leseigner finn pardonn zot, zot ousi pardone.

¹⁴Pli inportan ki tou, viv dan lamour, samem ki fer linite dan larmoni. ¹⁵Ki lape Lekris regn dan zot leker, pou samem ki zot tou finn apele pou form enn sel lekor. Viv dan rekonesans. ¹⁶Ki Parol Lekris prezan parmi zot dan tou so rises: ansegn zot prosin, fer zot ledikasion ar lasazes; par bann Psom, bann sante e bann kantik inspire par Lespri, sant zot rekonesans pou Bondie. ¹⁷Tou seki zot kapav dir ou fer, fer li dan nom Segner Zezi, e par li, rann gras Bondie Papa.

Kolosien 3: 12 – 17

Pran enn moman e demann tomem:

Pou ki zafer mo anv remersi Bondie aster-la? Ki sa sinifi pou mwa ... fer parti lekor Kris?

... Bondie rekonfort nou

To kapav vinn enn lasours rekonfor pou lezot. Partaz to bann santiman ek to lexperyans avek bann ki pe soufer.

³Anou loue Bondie ek Papa Zezi Kris, Papa ki ena mizerikord ek touletan konsol nou. ⁴Li rekonfort nou dan nou detres pou ki nou kapav rekonfort lezot ki pas par tou kalite problem, avek rekonfor ki limem li finn donn nou. ⁵Parey kouma nou ena enn gran par dan soufrans Lekris, dan mem fason nou gagn gran rekonfor atraver li. ⁶Si nou dan soufrans, li pou zot, pou ki zot gagn rekonfor ek delivrans; si nou trouv rekonfor, li pou zot, pou ki zot resevwar konsolasion letan zot siport avek pasians bann mem soufrans ki nou pe viv. ⁷Nou lespwar pou zot li tini ferm parski nou kone ki, parey kouma zot partaz nou soufrans, zot ousi partaz nou rekonfor.

2 Korintien 1: 3 – 7

... Gramatin lazwa briye

⁴Zot tou bann fidel sant louanz LESEGNER! Selebren so nom ki sin, e dir li mersi.

⁵So koler tengn vit e so bonte li permanan. Si aswar larm kapav koule, gramatin lazwa briye.

¹¹To finn fer mo tristes vinn enn ladans ki exprim lazwa; to finn efas mo sagrin e plonz mwa dan boner, ¹²pou ki mo leker loue twa, e pa gard silans! Bizin sant to grander. SEGNER, twa ki mo Bondie, mo pa pou aret dir twa mersi.

Psom 30: 4 – 5, 11 – 12

Bann benediksjon Bondie ek so lape rezerve pou zot

Leternel ava beni twa ek vey lor twa!

Ki LESEGNER beni twa e protez twa. Ki LESEGNER get twa avek bonte e donn twa so lagras. Ki LESEGNER manifeste so bonte anver twa e donn twa lape!

Nonb 6: 24 – 26

... Gagn lesperans an abondans ...

¹³Ki Bondie, lasours lesperans, ranpli zot ar lazwa ek lape par lafwa ki zot ena dan li, pou ki zot lesperans deborde par pwisans Lespri Sin.

Romin 15: 13

